

**Talamdan sa
Mga Mensahe alang sa Full-time Training
sa Spring Term sa 2023**

**LINANGKOB NGA HISGOTANAN:
ANG MAHINUNGDANONG MGA PUNTO SA KAMATUORAN SA MGA SULAT NI PABLO**

Mensahe 6

**Ang Pagmatarong tungod sa Pagtuo diha Niya
nga Naghatag og Kinabuhi sa Mga Minatay
ug Nagpaanaa sa Mga Butang nga Wala**

Basahong Kasulatan: Gen. 15:1-6; Rom. 3:20, 24-25; 4:3, 5, 13, 17; 1 Juan 5:11-13; 2 Cor. 5:17

- I. Naghisgot ang Roma 3:24 nga gimatarong [ta] nga walay bayad tungod sa Iyang [sa Dios] grasya pinaagi sa katubsanan nga naa ni Cristo Jesus”:**
- A. Ang pagmatarong pag-aprobar sa Dios sa mga tawo segun sa sukdanan sa Iyang pagkamatarong—v. 22.
 - B. Gimatarong ta sa Dios basi sa pagkamatay ni Cristo sa krus aron matubos ta; nabatongan sa dugo ni Jesus ang walay kataposang katubsanan alang nato—v. 25; Gal. 3:13; Tito 2:14; 1 Ped. 1:18-19; 2:24; 3:18:
 - 1. Kay gibayran na man ni Cristo ang atong mga sala ug sa Iyang katubsanan natuman na Niya ang tanang gipangayo sa Dios kanato, ang Dios, kay matarong man, walay bayad gyong momatarong nato—Rom. 3:24-25.
 - 2. Tungod gyod sa grasya sa Dios kining pagmataronga, dili sa atong mga buhat—v. 20; Gal. 2:16.
- II. Gimatarong si Abraham tungod sa pagtuo; “nituo siya ni Jehova, ug giisip Niya kini kaniya nga pagkamatarong”—Gen. 15:6; itandi sa Gal. 3:6; Rom. 4:2-3:**
- A. Ang pagtuo sa Dios maoy diha-dayong reaksyon ni Abraham sa balikbalik nga pagpakita sa Dios kaniya; ang pagtuo niya pagturok man sa sulod niya sa elemento mismo nga gipalatay sa Dios nganha niya—Gen. 15:1-6; Buh. 7:2; Gen. 12:1-3; 13:14-17.
 - B. Ang reaksyon sa Dios sa pagtuo ni Abraham pagmatarong man kaniya, sa ato pa, pag-isip kaniya nga matarong—15:6:
 - 1. Piho gyong nituo si Abraham sa pulong sa Dios, ug giisip Niya kini kaniya nga pagkamatarong—Rom. 4:2-5.
 - 2. Dili balos (suhol) sa maayong mga buhat (paghago) nato ang pagmatarong sa Dios; grasya kini nga librenge gihatag kanato pinaagi sa katubsanan ni Cristo—v. 4; 3:24.
 - 3. Ang pagmatarong sa Dios kang Abraham nagpasabot nga nalipay ang Dios kang Abraham ug nga naharmoniya siya sa Dios.
 - C. Walay kalabotan sa sala ang pagmatarong sa Dios kang Abraham; alang hinuon kini sa pagpakabaton og kaliwat nga magpalugwag gingharian nga manunod sa kalibotan—4:3, 13:
 - 1. Sa Genesis 15:6 nituo si Abraham nga dunay mabuhay ang Dios nganha niya nga makapahimugsog kaliwat gikan sa pagkatawo gyod niya aron matuman ang tuyo sa Dios—v. 4.
 - 2. Gipakita sa Roma 4 nga ang pagmatarong dili lang pagpahigawas kanato sa paghukom sa Dios kondili labi pa gyod aron makabaton ang Dios og daghang anak nga mag-umol sa Lawas ni Cristo nga gingharian sa Dios aron matuman ang Iyang tuyo—8:29-30; 12:4-5; 14:17.
- III. Nituo si Abraham sa Dios kalabot sa duha ka butang—sa pagpanganak kang Isaac, nga may kalabotan sa Dios nga “nagpaanaa sa mga butang nga wala,” ug sa paghalad ug pagkabaton og balik ni Isaac, nga may kalabotan sa Dios nga “naghatag og kinabuhi sa mga minatay”—4:17:**
- A. Ang nagpaanaa sa Dios sa mga butang nga wala mao ang dakong gahom sa Dios sa paglalang—v. 17:
 - 1. Isip Dios nga naglalang, wala Siya magkinahanglan nga mogamit og materyales.
 - 2. Makalalang Siyag butang gikan sa wala pinaagi ra sa pagpamulong: “Nisulti Siya, ug nahimo kini”—Sal. 33:9.

- B. Ang paghatag sa Dios og kinabuhi sa mga minatay mao ang dakong gahom sa pagkabanhaw—Rom. 4:17:
 - 1. Tungod ning dakong gahom mapapha nato ang kamatayon ug madaog ang tanang iya sa kamatayon.
 - 2. Nasinati ni Abraham kining dakong gahom sa pagkabanhaw sa paghalad niya ni Isaac segun sa sugo sa Dios—Heb. 11:17.
- C. Sa pagkahimugso ni Isaac, nituo si Abraham sa Dios ug nasinati niya ang Dios nga nagpaanaa sa mga butang nga wala—Rom. 4:17-21:
 - 1. Nisaad ang Dios nga himuon Niya si Abraham nga dakong nasod—ang gingharian sa Dios, nga hinimo sa nasod sa Israel nga gingharian sa Dios sa Daang Tugon, sa iglesia nga gingharian sa Dios sa Bag-ong Tugon, sa gingharian sa millennium sa umalabot nga panahon, ug sa bag-ong langit ug bag-ong yuta sa eternidad—Gen. 12:1-2; Mat. 21:43; 16:18-19a; Rom. 14:17; Bug. 11:15; 22:5.
 - 2. Sa Genesis 15 nianhi ang Dios aron ipakita kang Abraham nga nagkinahanglan siya sa grasya sa Dios sa sulod aron matuman ang tuyo sa Dios, nga makabaton og katawhan nga magpadayag sa Dios sa Iyang dagway, morepresentar Niya uban sa Iyang pagbulot-an, ug manag-iya sa yuta—1:26-28.
 - 3. Nituo si Abraham nga dunay mabuhat ang Dios nganha niya nga magpahimugso gikan niya sa kaliwat nga gikinahanglan—15:6.
- D. Sa nadawat og balik ni Abraham si Isaac human siya ihalad sa Dios ingog halad nga sinunog diha sa halaran, nituo siya sa Dios ug nasinati niya ang Dios nga naghatag og kinabuhi sa mga minatay—Rom. 4:17; Heb. 11:17-19; Gen. 22:1-19:
 - 1. Ang kinabuhi sa Beer-sheba nagpalugwag halad nga sinunog nga ihalad sa Dios sa Bukid sa Moria—vv. 1-2:
 - a. Ang panginabuhian ni Isaac naghimo niyang halad nga sinunog, nga gihalad sa Dios aron matagbaw Siya—vv. 2, 7-8.
 - b. Iya sa Dios ug pinaagi sa Dios ang tanang may kalabotan ni Isaac, ug gipangayo sa Dios nga ihalad ni Abraham si Isaac balik Kaniya ingon nga halad nga sinunog—vv. 1-2.
 - 2. Si gihalad na si Isaac, gibalik siya kang Abraham sa pagkabanhaw ug nahimong panalangin; maingon man sab, sa mahalad na nato sa Dios ang nadawat nato Kaniya, ibalik kini Niya kanato sa pagkabanhaw, ug mahimo kining panalangin nga motuman sa Iyang tuyo—vv. 12-13, 16-18; Heb. 11:19.

IV. Isip mga magtutuo ni Cristo nga gimatarong tungod sa pagtuo nato sa Dios nga naghatag og kinabuhi sa mga minatay ug nagpaanaa sa mga butang nga wala, masinati nato ang Dios, nga naghatag natog kinabuhi ug magpaanaa sa mga butang nga wala—Rom. 3:24-25; 4:3, 5, 17:

- A. Sa dihang gimatarong ta sa Dios, gihatagan ta Niyag kinabuhi—ang diosnon ug walay kataposang kinabuhi diha ni Cristo, ang kinabuhi nga dili malaglag—1 Juan 5:11-13; Heb. 7:16:
 - 1. Ang pulong *diosnon* nagpasabot og iya sa Dios, dunay kinaiya sa Dios—Efe. 4:18.
 - 2. Ang pulong *walay kataposan* nagpasabot og dili linalang, walay sinugdan o kataposan, naanaa sa iyang kaugalingon, molungtad sa dayon, dili mausab ang pagkaanaa, ug dili malaglag—Juan 3:15-16; 1 Juan 5:13.
- B. Sa gimatarong ta sa Dios, gipaanaa Niya ang mga butang nga wala ug gihimo tang bag-ong binuhat—Rom. 4:17; 2 Cor. 5:17:
 - 1. Sa usa ka panahon walay bag-ong binuhat sa sulod nato, apan sa gimatarong na ta sa Dios, niana gyong tungora, gipaanaa Niya ang mga butang nga wala; karon naa nay bag-ong binuhat sa sulod nato—v. 17.
 - 2. Ang bag-ong binuhat—ang panagsagol sa Dios ug tawo—nahitabo sa dihang naumol sa atong pagkatawo ang Tulo-usang Dios diha ni Cristo nga Espiritu—Efe. 3:16-17a.
- C. Nakita nato kaniadto nga sa gimatarong ta sa Dios, giaprobahan ta Niya segun sa sukdanan sa Iyang pagkatarong; nakita nato karon nga ang pagkatarong naglakip sa diosnon, walay kataposang kinabuhi nga gihatag kanato ug sa bag-ong binuhat nga gipaanaa sa sulod nato—Rom. 4:17.